



OMLADINSKA BANKA JE OMLADINSKI PROJEKAT FONDACIJE TUZLANSKE ZAJEDNICE

U drugom aplikacionom krugu koji je zvanično otvoren 17.09.2007. godine (pozivom na apliciranje) a zatvoren 12.10.2007. godine (organizovanjem prezentacije od strane aplikantata koji su realizovali projekte), ukupno je bilo prijavljeno 12 projektnih prijedloga različitih formalnih i neformalnih grupa mladih sa područja Grada Tuzle.

Odbor Omladinske banke Tuzla kojeg čine mladi ljudi u rasponu godina od 15 do 20 je nakon procesa predselekcije i intervjua donio konačnu odluku da Omladinska banka podrži 9 projekata mladih u ukupnom iznosu od 3820 KM.

Projekti koji su odobreni se najviše odnose na jačanje aktivizma i volonterizma mladih ljudi kroz adaptaciju prostorija, osposobljavanje sportskih terena, organizovanjem edukativnih kurseva ili pozorišnih predstava.

Projekat Omladinske banke Tuzla finansijski podržava Fondacija tuzlanske zajednice kao svoj Omladinski projekat, na način da pronalazi donatore kao što su Općina Tuzla, Dumfries&Galloway Action iz Škotske, Freudenberg Stiftung, CS Mott foundation i sl.

O pobjedničkim projektima

Na dan 01.11.2007. godine izvršena je promocija projekata i nosilaca projekata koji su u Drugom aplikacionom krugu osvojili grant sredstva. Na isti dan izvršeno je i potpisivanje ugovora između grupa sa jedne strane i Fondacije tuzlanske zajednice koju zastupa Jasna Jašarević i Omladinske banke koju zastupa predsjednik Odbora Azur Ramić sa druge strane. Na svečanoj promociji i potpisivanju ugovora želja nam je bila stvoriti jaku mrežu mladih osoba koje će sutra biti nosioci promotivnih aktivnosti Omladinske banke Tuzla.

U narednom tekstu ćemo dati opis projekata koji su dobili grant sredstva u Drugom aplikacionom krugu 2007. godine:



1.

Naziv projekta: Plesni bal

Nosioci projekta: Udruženje studenata fakulteta za tjelesni odgoj i sport

Oblast: Sport

Traženi iznos: 700,00 KM

Odobreni iznos: 400,00 KM

Opis realizacije projekta:



Udruženje studenata fakulteta za tjelesni odgoj i sport je na osnovu dobijenih grant sredstava od strane Omladinske banke Tuzla kao i na osnovu plana aktivnosti prezentovanog u aplikaciji realizovao projekat Plesni bal. Prvenstveno je realizovana škola plesa u trajanju od 5 mjeseci za 70 studenata i nekolicinu uposlenika gdje su imali besplatnu obuku od strane voditelja. Cilj projekta jeste stvoriti mrežu studenata zasnovanu na plesu. Na plesnom balu koji je odžan. Projekat je realizovan na 45 godišnjicu postojanja Fakulteta za tjelesni odgoj i sport te je Plesni bal otvorio dekan ovoga fakulteta profesor Branimir Mikić. Na samom Plesnom balu je učestvovalo preko 200 plesača koji su imali priliku pokazati šta su sve naučili u petomjesečnoj obuci ali također i takmičiti se za nagradu sedmodnevnog putovanja u Španiju. Projekat je zadovoljio očekivanja i ostvario ciljeve prezentovane u aplikaciji.

2.

Naziv projekta: Dani otvorenih vrata

Nosioci projekta: Neformalna grupa pri Omladinskom centru IPAK

Oblast: Zabavno-društveni sadržaji

Traženi iznos: 700,00 KM

Odobreni iznos: 400,00 KM

Opis realizacije projekta:

Manifestacija pod nazivom Dani otvorenih vrata za promociju volonterizma održana je 15.12.2007. godine na području lokalne zajednice Simin Han u OŠ Simn Han. Aktivnosti koje su ispunile ovu manifestaciju jesu turnir u odbojci, nastup folklorne sekcije, nastup teatar grupe, nastup rock grupe, nastup recitatorske sekcije, nastup plesne sekcije. Kroz sportske aktivnosti i kroz kluturno-zabavni program ukupno je učestvovalo preko 120 mladih ljudi, što je jasan pokazatelj aktivizma i volonterizma na području MZ Simin Han. Još jedan od konkretnih rezultata projekta jeste aktivno učešće različitih aktera (OŠ Škola, FK Sloga, Agora centar i sl) u organizovanju ove manifestacije.



3.

Naziv projekta: Volim BiH, 25.11.2007. godine

Nosioci projekta: Omladinski pokret REVOLT

Oblast: Neformalna edukacija i ekologija

Traženi iznos: 754,00 KM

Odobreni iznos: 350,00 KM

Opis realizacije projekta:



Na osnovu prijedloga projekta planirano je da se povodom Dana državnosti BiH održi javna tribina na kojoj bi se diskutovalo o historiji BiH i važnosti obilježavanja nacionalnih datuma, kao i ekološka akcija sađenja sadnica na parku Slana Banja. Zbog vremenskih uslova koji nisu dozvolili sađenje sadnica, na osnovu zahtjeva OP Revolt aktivnost je pomjerena na obilježavanje Dana nezavisnosti 01.03.2008. godine kada je i realizovana aktivnost sađenja sadnica, i gdje su mladi kroz aktivizam pokazali da je neophodno održavati prirodno blago. Javna tribina nije održana, međutim aktivizam mladih povodom ovog datuma pokazuje koliko su mladi opredjeljeni za promociju nacionalnih praznika i domovine Bosne i Hercegovine.

4.

Naziv projekta: Novine BS

Nosioci projekta: Novinarska sekcija UG Bolje Sutra

Oblast: Edukacija mladih

Traženi iznos: 700,00 KM

Odobreni iznos: 450,00 KM

Opis realizacije projekta:

Realizacija ovoga projekta je imala pozitivan odjek, kako na animatore Udruženja Bolje Sutra, tako i na njegove korisnike. Naime, u toku radnog vijeka ovog udruženja (1995), nije postojala novinarska sekcija, a samim tim nisu izdavane ni novine koje bi uređivali članovi ovog udruženja, sve do septembra 2007 godine, kada su se mladi okupili i pokazali interesovanje za ovu sekciju. Fondacija tuzlanske zajednice sa svojim projektom Omladinska banka Tuzla je dala "pečat" radu novinarske sekcije podržavši projekat "Novine BS" i njihovo prvo izdanje. U pripremi novina učestvovalo je 15 mladih i djece koji su kroz kreativne radionice i novinarske vještine dobili krajnji rezultat, a to je izdate prve novine udruženja "Novine BS". Opravdanost podržavanja ovog projekta Omladinska banka Tuzla vidi i u tome što su ove novine izašle u jednom od izdanja Tuzlanskog lista, gdje su građani imali priliku upoznati rad udruženja Bolje Sutra ali i Omladinske banke Tuzla.



5.

Naziv projekta: Interkulturalnost u školama

Nosioci projekta: Dramska sekcija OŠ Simin Han

Oblast: Edukacija mladih, rušenje predrasuda

Traženi iznos: 577,20 KM

Odobreni iznos: 400,00 KM

Opis realizacije projekta:



Projekat "Interkulturalnost u školama" realizovan je od strane učenika OŠ Simin Han, odnosno članova dramske sekcije ove škole. Projekat se zasnivao na pripremi i izvođenju predstave koja govori o diskriminaciji roma u školama ali i u društvu uopšte. Pored rušenje predrasuda o romima, projekat je imao notu aktivizma jer su članovi novinarske sekcije, samostalno kreirali scenarij, dijelili uloge ali i pripremili scenu i kostime za izvođenje predstave. Omladinska banka Tuzla je ponosna što podržava projekte koji ruše predrasude kod mladih i jačaju aktivizam i volonterizam mladih u ruralnim područjima.

6.

Naziv projekta: Zeleni projekat

Nosioci projekta: Vijeće učenika OŠ Tušanj

Oblast: Ekologija, sigurnost mladih

Traženi iznos: 620,00 KM

Odobreni iznos: 470,00 KM

Opis realizacije projekta:

Na osnovu ideje koju je prezentovalo Vijeće učenika OŠ Tušanj, Omladinska banka Tuzla je odobrila uređenje dijela školskog dvorišta u mjesto okupljanja učenika škole i mladih iz zajednice. Naime, mladi su pokazali ogromnu potrebu za mjestom gdje bi se tokom školskog odmora ali i nakon škole odmarali i provodili slobodno vrijeme. Projekat je realizovan na osnovu aktivizma i volonterizma učenika ali i mladih uposlenika škole. Još jedan od bitnih pokazatelja uspješnosti projekta jeste da je mjesto gdje je uređeno dvorište prije bilo ruglo ne samo škole nego i zajednice. Sada je dvorište do te mjere sređeno da je moguće izvoditi časove u prirodi.



7.

Naziv projekta: Prevencija i intervencija nasilja u školi

Nosioci projekta: Vijeće učenika OŠ Simin Han

Oblast: Edukacija, prevencija nasilja

Traženi iznos: 680,00 KM

Odobreni iznos: 450,00 KM



Opis realizacije projekta:

Projekat su realizovali učenici osnovne škole «Simin Han» sa ciljem zaštite ljudskih prava i prava djece kroz smanjenje nasilja nad djecom. Interesantna podatak koji daje konkretan rezultat projekta jeste da je u OŠ«Simin Han» tokom školske 2006/07 godine bilo manje nasilja među vršnjacima. Aplikanti su kroz anketu identifikovali probleme o nasilju i uključili one učenike koji nasilno reaguju u edukaciju . Pored roga održan je okrugli sto gdje je bilo prisutno mnogo roditelja, učenika, nastavnika ali i predstavnika nevladinih organizacija.

Zaključak je da je neophodna edukacija roditelja, nastavnika i učenika o seksualnom nasilju, emocionalnom ali i socijalnom koji je sve prisutniji u našoj sredini. Potrebno je izvršiti istraživanje i o nasilju djece nada odraslim. Preporuka je da se formira tim za medijaciju a da se učenici educiraju za vršnjačku medijaciju. U sklopu ovih aktivnosti predstavili smo naše aktivnosti na Vesta radiju, Tuzlanskom listu i na web portalu ioskole.net. Dakle, ovo je samo jedan od koraka ka sprečavanju nasilja u školama, ali put je još dug.

8.

Naziv projekta: Vodić kroz investiranje

Nosioci projekta: Asocijacija studenata Ekonomskog fakulteta

Oblast: Edukacija

Traženi iznos: 400,00 KM

Odobreni iznos: 350,00 KM

Opis realizacije projekta:

Provedenom anketom na Ekonomskom fakultetu u Tuzli, tim za izradu projekta je zaključio da se studenti suočavaju sa problematikom nedostatka literature koja se tiče investiranja i osnovnih koncepta izrade biznis plana. Literatura koju studenti mogu naći u knjizarama ili na internetu je u nažalost velikom broju studenata nedostupna zbog nedostatka finansijskih sredstava. Relevantnost znanja iz tih oblasti je velika za sve studente ekonomskih nauka koji bez adekvatnog poznavanja te materije neće moći ispuniti očekivanja koja će se zahtijevati od njih u našoj razvijajućoj tržišnoj privredi. Aplikanti su realizovali projekat, te učinili dostupnim isti besplatno za sve studente Ekonomskog fakulteta ali i druge. Benefit od ovoga projekta ima veliki broj mladih koje zanima pokretanje vlastitog biznisa. Spremnost mladih ljudi da ulože svoje znanje i vrijeme kako bi osigurali dobrobit za širu zajednicu, je zvijezda vodilja koja motiviše Omladinsku banku Tuzla da podržava inicijative mladih.



9.

Naziv projekta: Uređenje košarkaškog igrališta

Nosioci projekta:

Oblast: Sport, infrastruktura

Traženi iznos: 620,00 KM

Odobreni iznos: 550,00 KM



Opis realizacije projekta:

UG Rad iz Rapača kod Lipnice je od prijašnjih aktivnosti poznato Omladinskoj banci po korektnosti u radu ali i zbog jačanja kapaciteta mladih. Nakon izvanredno urađenog fudbalskog igrališta ovaj put su aplicirali za novac kako bi uredili košarkaški teren i kako bi nabavili koševе i table. Totalno ruglo su pretvorili u teren gdje će mladi ljudi provoditi vrijeme i gdje će se možda roditi neka buduća zvijezda.

Planovi za budućnost

Omladinska banka Tuzla, ponovno otvara poziv aplikantima na finansiranje omladinskih projekata u visini do 700 KM u periodu od 03. marta do 04. aprila 2008. godine. Ovaj poziv je upućen svim formalnim i neformalnim grupama mladih ljudi koji imaju ideju i želju da nešto promjene u lokalnoj zajednici što doprinosi boljem životu građana.

***Budite i Vi aktivni! Pospješite život mladih i Vaše zajednice!
Promovišite i Vi Omladinsku banku Tuzla***